



## **Komunikadu Imprensa**

**23 Outubru 2019**

### **Xefe Suku Nanu husu ba estrutura suku no comunidade sira bele kontinua habelar informasaun ne'e ba comunidade seluk ne'ebé la hola parte iha treinamentu ne'e**

Iha 17 Outubru 2019, JSMP realiza treinamentu ba estrutura suku no comunidade sira iha suku Nanu, Postu Administrativu Fatumea, Munisípiu Covalima. Materia ba treinamentu ne'e kona-ba “Demokrásia, knaar órgaun soberanu no partisipasaun públiku iha prosesu halo lei no asesu ba justisa formál”.

Materia ne'e fahe ba sesaun rua; sesaun primeiru konstitui informasaun kona-ba “Estadu Demokrátiku, póder sira órgaun sira Estadu nian, prosesu halo lei no oinsa públiku bele hola parte no sesaun segundu kona-ba “Direitu Umanu, Sistema Justisa iha Timor-Leste, krime públiku no semi públiku, akuzadu no vítima sira nia direitu bainhira envolve no sai nu'udar vítima husi krime ruma.

Partisipante sira ne'e mai husi aldeia Nanu, Macocon no Halik Nai ne'ebé envolve membru estrutura suku sira, comunidade no estudante sira. Partisipante sira hamutuk na'in 30 ne'ebé kompostu husi feto na'in 15 no mane na'in 15.

Iha abertura, JSMP esprika kona-ba objetivu husi programa treinamentu ne'e mak atu fahe informasaun ba membru estrutura suku no comunidade sira hodi hasa'e sira-nia koñesimentu kona-ba lala'ok sistema demokrásia, knaar no kompeténsia órgaun estadu ida-idak nian nomós oinsa membru comunidade sira bele hatene kona-ba oinsa atu prosesu kazu sira tuir sistema justisa formál ne'ebé ejiste ona. JSMP observa katak iha realidade comunidade barak mak sei konfunde kona-ba knaar husi órgaun estadu sira nian no bainhira comunidade sira hasoru kazu ruma ne'ebé relevante ho knaar tribunál nian, comunidade sira sempre halo fali keixa ba iha Parlamentu Nasionál no órgaun Estadu sira seluk. Tanba ne'e mak treinamentu ida ne'e importante atu fahe informasaun ba membru comunidade no estrutura suku sira maizumenus bele hatene no iha koñesimentu kona-ba prosesu sira ne'e.

“Atividade treinamentu ne'e hanesan komimentu ida ne'ebé JSMP kontinua oferese ba comunidade no membru konsellu suku sira atu sira bele iha koñesimentu ba asuntu sira ne'ebé iha relasaun ho sira-nia direitu no devér ne'ebé konsagra iha lei sira ne'ebé vigora iha Timor-Leste, liu-liu atu hadi'a sira-nia dezempeñu serbisu iha sira-nia comunidade hodi bele kontribui ba desenvolvimentu nasionál ida ne'ebé di'ak no sustentavel,” dehan Diretór Interinu JSMP, Casimiro dos Santos.

Xefe Suku Nanu, Sr. Anselino do Cruz iha abertura no enseramentu subliña katak informasaun ne'ebé JSMP oferese ne'e importante no relevante tebes ba sira-nia serbisu no moris iha

komunidade. Nia konsidera treinamentu ne'e hanesan oportunidade ida ne'ebé partisipante sira tenke aproveita didi'ak, tanba haree ba kondisaun estrada, distánsia, meu komunikaun sira ne'ebé la iha, membru estrutura suku no comunidade sira susar atu hetan informasaun sira hanesan ne'e. Aleinde ne'e, nia husu ba membru konsellu suku no comunidade sira ne'ebé hola parte iha atividade treinamentu ne'e atu kontinua habelar informasaun ne'e ba comunidade sira seluk ne'ebé la konsege partisipa.

Iha diskusaun, iha sesaun dahuluk nian, partisipante sira halo komentáriu kona-ba sistema demokrásia kompara ho monarkia. Tuir partisipante sira, sistema ukun rua ne'e iha nia di'ak no mós nia aat. Parte di'ak iha demokrásia, ema hotu-hotu iha direitu no devér hanesan ba buat hotu, inklui ba ukun no iha liberdade no parte la di'ak mak la dun iha respeito malu, liu-liu baihhira halo kítika ba na'in ulun sira nomós entre na'in ulun sira, tanba liberdade la ho responsabilidade. Relasiona ho komentáriu ne'e, JSMP reforsa tan katak sistema ukun sira ne'e iha prinsípiu sira hotu di'ak depende ba ita ema ne'ebé uza ka adota sistema ne'e. Iha demokrásia buat hotu-hotu regula ho lei no lei sira ne'e refleta interese ema hotu nian. Nune'e, direitu no liberdade ema ida nian hotu ka limita bainhira ema seluk nia hahú. La iha ema ida iha demokrásia iha direitu no liberdade atu insulta ema seluk ba asuntu privadu tanba lei asegura ema nia direitu ba onra, dignidade no naran di'ak. Bainhira ema ruma la respeito ema seluk, ne'e la'ós tanba demokrásia, maibé tanba kestaun morál no étika ema ida-idak nian ne'ebé ligadu ho lisan no kultura. Tanba ne'e importante atu demokrásia ne'e tenke han malu ka kaben ho lisan no kultura lokál hanesan monarkia ne'ebé sempre ligadu ho lisan no kulturál lokál, nune'e demokrásia bele la'o ho di'ak.

Iha sesaun daruak nian, partisipante sira foti kestaun relasaun asuntu violénsia ne'ebé akontese iha família uma laran ne'ebé bainhira akontese ema seluk mós bele halo keixa, tuir partisipante sira hanoin katak ne'e problema uma laran maibé ema seluk mós hakarak mete. Aleinde ne'e partisipante sira mós kestiona kona-ba atuaun polísia sira-nian ne'ebé naran baku ema sein koñesimentu autoridade suku sira. Hatan ba kestaun ne'e, JSMP kontinua afirma katak violénsia doméstika nu'udar krime públiku no fó exemplu kazu violénsia doméstika sira ne'ebé JSMP monitoriza iha tribunál. Entretantu kona-ba atuaun polísia nian ho violénsia, JSMP hato'o katak atuaun ho violénsia viola direitu umanu tanba polisia nu'udar instituisaun Estadu ne'ebé iha autoridade no violénsia ne'e rasik mós nu'udar krime, polisia la bele halo justisa ho sira-nia liman rasik. Ema sira ne'e konsidera sei inosente to'o tribunál deside katak sira sala duni. Polisia bele halo lejítima defeza bainhira iha situaun balun polisia hetan reasaun ho sasan kro'at ne'ebé ameasa fali polisia nia vida, maibé ida ne'e último rekursu no uza tuir regras. Enkuantu atuaun sein koñesimentu autoridade lokál, tuir JSMP nia hanoin, di'ak liu iha komunikaun entre polisia no autoridade lokal sira iha termu kooperasaun, kordenasaun no apoia.

Treinamentu ne'e realiza tanba ho apoiu financeiru husi Governu Timor-Leste, liuhusi Fundu Sociedade Sivíl iha Gabinete Primeiru Ministru.

Atu hetan informasaun kompletu bele kontaktu:

Casimiro dos Santos

Diretór Interino JSMP

Email: [casimiro@jsmp.tl](mailto:casimiro@jsmp.tl) |

Telefone: 3323883 | 77257466